

A JUN BIT MANXA WATX'ILOK

1 ¹ A wal jun is poesía cham Salomón manxa watx'ilok ti'.

Babel Makan

Chi yal ix k'opoj axca ti':

- ² Tz'ubc'al el in ti' ach in camc'ulnebil. Yelxac'al watx' a camc'ulal chi wab yintak vino.
- ³ Manxa watx'ilok yoc jabil perfume en, a wal yet chach binaji, lajan wal chi wab axca yel jabil perfume. Yuj tu' xan tok ay junok eb ix k'opoj tol c'am chach camc'ulneni.
- ⁴ Iintok etok yin aymanil, iintok bay a cuarto xin ach wajawil, ãi ix.

Chi yal eb amigo:

Manxa tzalojc'ulalok chon ayji ec' etok; caw wal ok jochej a camc'ulal yintak vino. Yuj tu' xan xiwil chi camel c'ul eb ix k'opoj en, ãi eb.

Chi yal ix k'opoj axca ti':

- ⁵ Ex ix aj Jerusalén, ayin ti' k'ekmak'inak wili, palta watx' wili; k'ek wili axca wal yili manteado bay Cedar, watx' wili axca yili cortina yul yatut cham Salomón.
- ⁶ C'am chex oxcac'al t'anan win, yujtol k'ek wili, yujtol tz'anak in yuj yakan c'u. A eb nak in nuej max tit yowal eb win, max in yaon oc eb yin in taynen awoj uva, yuj tu' xan max in bek ilnej in ba.
- ⁷ Ak' wojtaknej el ach in camc'ulnebil, ¿baytal chach ilwi calnel? ¿baytal chetok no' yebaj ba yet chuman c'u? ¿Tzet yuj xan tol chin ec'jab axca junok ix ix tol toc'al chi ec'jab xol eb et ilom calnelal? ãi ix.

Chi yal eb amigo:

⁸ Ta man ojtakok ach ix tol yelxac'al watx' eli xol eb ix ix watx' yili, tzaklojan yintak yakan no calnel, a bay tu' chel no' a yunetak chiwo, bay cawilal is lanchu eb ilom calnel tu', xi eb.

Chi yal nak:

⁹ In camc'ulnebil ach, lajan ach chi wil axca junok no' k'opoj chej chi ec' xol is carruaje faraón.
¹⁰ Watx'xac'al yili a sat nan xol yu a txiquin, watx'xac'al yili a nuk' bay ayoc ch'en uej.
¹¹ Ok co watx'nej yu a txiquin naba oro, ok oc ch'en plata yelbubok, xi nak.

Chi yal ix k'opoj:

¹² Yak'ban chotan ay wajawil bay is meña, axa an nardo chi el sumumok jabil win.
¹³ A in camc'ulnebil lajan wal chi wab axca junok tx'uy an mirra, tol a wal bay txam in c'ul ayic'ok.
¹⁴ A wal in camc'ulnebil lajan wal axca junok yuchan an alheña chi ch'ib bay En-gadi, xi ix.

Chi yal nak:

¹⁵ Manxa watx'ilok eli ach in camc'ulnebil, caw wal watx' eli. Lajan yili a bak' sat axca yili no' cakmu, xi nak.

Chi yal ix k'opoj:

¹⁶ Caw wal watx' eli ach in camc'ulnebil, caw wal watx' eli. A wal an yax ac'un ok oc co wayubok, xi ix.

Chi yal nak:

¹⁷ A te c'ute' ok oc axca patzabilok co na, axa te q'uisis ok oc axca is patilok, xi nak.

Chi yal ix k'opoj:

2 ¹ Lajan in axca junok an xumac bay jobeal yet Sarón, axca an chochol chi ch'ib bay ac'al, xi ix.

Chi yal nak:

² A wal ix in camc'ulnebil xol eb ix ix, lajan wal axca junok an xumac xol te q'uix, xi nak.

Chi yal ix k'opoj:

- ³ A wal nak in came'ulnebil xol eb ach'ej, lajan wal yili nak axca junok te mansan ayaj xolak te te'. Manxa watx'ilok way chotan bay yenel, caw wal chi' sat te' chi wabej.
⁴ Max in yitok bay nail miman loj, yetok wal is came'ulalil max oc t'anan win.
⁵ Ak' an c'oxox uva ayin yet chi oc wip; a wal te mansan chak' in lo', yet chi sicbi in c'ul, yujtol caw wal chin camel ach wocheni.
⁶ A is q'uexan k'ab chi yaoc yalan in jolom, axa is watx' k'ab chin lak'oni, xi ix.

Chi yal nak:

- ⁷ Ex k'opoj aj Jerusalén, chi wak' binaj no sakchej c'al no tx'ucchej bay xolak te' yin in tewilal ayex, tol c'am che yak' yochej ajok, masantac'al a' ok ochenok, xi nak.

Junxa yet is cab makan

Chi yal ix k'opoj:

- ⁸ ¡A... lanan jayoc nak in came'ulnebil! Chixa wab yoc yul is nuk' nak; tol wal chi aj t'uknajok chi tit bay jolomlak witz. Chi aj t'uknajok chi jayoc bay tzalanlak.
⁹ A wal nak in came'ulnebil tu', lajan wal axca tx'ucchej, axca wal junok yune' tx'ucchej. Ayxa ec' yinlak na ti', lananxa jayoc bay wentenalak, cax t'ananxac'al octek bay yulak olan.
¹⁰ A nak in came'ulnebil tu', max yal nak ayin axca ti': Ajan wan ach in came'ulnebil, titan ach ochebil wuj.
¹¹ Ilabi, mayal ec'tok c'ual sicnab.
¹² Ayxa an xumac bay xolak te', mayal apni is c'ual yet chi oc bit, chixa jab yoc nuk' no cuajte' cayti'.
¹³ Ayxa sat te higo, sumumixac'al yel jabil an uva. Ajan wan xin, ach in came'ulnebil, ach tol manxa watx'ilok eli, titan, xi nak ayin, xi ix.

Chi yal nak:

- ¹⁴ Ach in came'ulnebil, lajan ach axca no cakmu, tol chi c'ubaj el ba bay satlak ch'en. Tx'ox a sat ayin, tx'ox yul a nuk' wabej. Caw wal watx'xac'al eli, caw wal watx'xac'al yoc yul a nuk' chi wabej.
¹⁵ Uktejek no wax, yetokc'al no yune', tol chi yetnej el no' an co uva, mawal axca an lananto yak'on xumaquil, xi nak.

Chi yal ix k'opoj:

- ¹⁶ Yet in nak in came'ulnebil; wet c'apax nak, chi ilwi calnel nak bay xolak an xumac.

17 Yak'ban c'amto chi aj wan cak'ek' yet k'inibalil, yet c'amto chi sakbi, meltzojantek ayin ach in camc'ulnebil. Lajan chot a ba axca junok tx'ucchej, axca no ach'ej tx'ucchej toxac'al chi aj t'uknaj tit bay tzalquixtak, xi ix.

Chi yal ix k'opoj:

- 3** ¹ A bay sat in tx'at yet ak'balil, max in wayichnej in sayon ec' nak camc'ulnebil wuj. Max in sayic'ok, palta maj ilchaj wuj.
- ² Lajwi tu xin, max in aj wanok, max in ec' in sayon ec' bay yul conobal tu'. Chin sayon ec' jun camc'ulnebil wuj tu' bay yulak calle, c'al bay yulak txonbal. Max in sayc'al, palta maj ilchaj wuj.
- ³ Max in k'anlen bay eb patrulla chi ec' taynen conob tu': ¿Maj mi e yil nak camc'ulnebil wuj? quin chi.
- ⁴ Tolto wal chin el bay eb nak tu', cax max ilchaj nak camc'ulnebil wuj. Max in oxcac'al nic'an yin is k'ab, cax c'amxa chin bekilok, max wiontok bay yatut in txutx, bay cuarto in txutx bay max quin alji, xi ix.

Chi yal nak:

- ⁵ Ex k'opoj aj Jerusalén, chi wak' binaj no sakchej c'al no tx'ucchej bay xolak te' yin in tewilal ayex, tol c'am che yak' yochej ajok, masantac'al a' ok ochenok, xi nak.

Yet is yox makan

Chi yal eb amigo:

- ⁶ ¿Tzet yetal jun chi tit bay tz'inan tx'otx' tu', tol xol jun toban mub chi tita, a ton xol mubal mirra c'al incienso, yetokc'al masanil makanil perfume txonbil yuj eb comerciante?
- ⁷ A ton is batxbanil ec' cham Salomón. Oyan oc 60 soldado yin, a ton wal juntzan eb soldado yelxac'al jelan xol eb israel.
- ⁸ Masanil juntzan eb tu', espada chi k'anbalnej eb, caw wal jelan eb yin ak'oj owal. Junjunc'al eb ayoc yespada eb yin is nan, ta c'uxan ay tzet yet ak'balil.
- ⁹ Max watx'nej cham Salomón jun is batxbanil ec'ok, yetok te' watx'il te' ay bay Líbano.
- ¹⁰ A yoyal ayajok, naba plata, axa k'elub yichin, oroc'al elok; axa bay chi ay chotanok, a an púrpura ayoc yin; axa bay yul tu' ayoc yelbub watx'nebil yuj eb ix ix aj Jerusalén, yuj tx'oxon eb camc'ulal.
- ¹¹ Ex ix aj Sión, elanektok e yil cham rey Salomón, ayaj corona yuj, a ton jun max yaaj is txutx yin is jolom, t'inan chi oc yopiso yet c'ual is nupayil, a ton jun c'ual manxa tzalojc'ulalok, xi eb.

Chi yal nak:

- 4** ¹ Caw wal watx'xac'al eli ach in camc'ulnebil, yel wal watx' eli. A wal a bak' sat, lajan wal yili axca cac'onok no cakmu, makan el a sat yuj junok k'apej. A xil a jolom, lajan wal yili axca yaytek bululok no chiwo bay pac'an yet Galaad.
- ² Axa ch'en e, watx'c'al yili ch'en, lajanxac'al yili ch'en axca yili no calnel tolto chi tzuklayi, axca yili no' yet tolto chi tx'ajlay no', cac'onc'al bey no' yetok yune', c'am junok no' tol tx'oklil.
- ³ Cakxobinaxcac'al xak a ti' axca cak tx'al, tx'okxa watx'il a k'anjabi. Axa paq'uul-lak a sat makan el yuj junok k'apej, axcac'al yili yul cabok bijan te granada.
- ⁴ A wal a nuk', lajan wal axca torre watx'nebil yuj David, ayoc 1,000 makbal julbalej yet eb soldado jelan yelbubok.
- ⁵ A cabil em, lajan wal yili axca cac'onok yune' tx'ucchej tiox, chi low bay xolak an chochol.
- ⁶ Yak'ban c'amto chi aj wan cak'ek' yet k'inibalil, yet c'amto chi sakbi, ok in tok bay jolom witz bay ay an mirra, c'al bay tzalanlak bay chi ch'ib an incienso.
- ⁷ Caw wal watx' eli ach in camc'ulnebil; caw wal watx' yili a mimanil masanil, caw wal c'am janic'ok a tacnakilal.
- ⁸ Ach tol ok ach oc wetbiok, ton wetok bay LÍbano; ton wetok bay jolom witz LÍbano. Ilaytok jobe tac'al bay jolom witz Amana ti', bay jolom witz Senir, ac'al oc bay jolom witz Hermón, bay ay nach'en no coj, c'al bay cajan no leopardo.
- ⁹ Ach camc'ulnebil wuj, ok ach oxcac'al wetbiok, mayal wal canxac'al in nabal en, yujc'al max in el janic', cax max wilon jun tx'anil uej locan oc yin a nuk'. Jun el ch'an max mutz'mon oc a sat win. Caytu' max yun yiji in c'ul oj.
- ¹⁰ Manxa wal watx'ilok a camc'ulal, ach ok ach oc wetbiok. A a camc'ulal tu', yelxac'al watx' yintak vino, yelxac'al watx' a perfume cha k'ana', yintak masanil makan sumumi jab.
- ¹¹ Ach ok ach oc wetbiok, axca wal yalcab ayoc yin xak a ti', axca wal yalcab, c'al leche ay yul a ti'. Axca wal yoc sumumial jab LÍbano, cay wal tu' yoc jabil a pichil.
- ¹² Ach ok ach oc wetbiok, lajan ach axca junok awoj tol makan ajok, axca nuk' aej tol makan ajok, caw wal watx' makayi.
- ¹³ Lajan ach axca junok awoj bay ay wol te granado, wal sat awoj manxa chialok, ay c'apax an alheña,
- ¹⁴ an nardo, c'al an azafrán, yetok juntzan te caña sumumi yoc jabil, yetokc'al canela, yetok masanil pojanil te incienso, yetok mirra c'al yetok áloe, masanil tzet yetal tol watx' yoc jabil.

15 Lajan ach axca a' nuk' aej xol awoj, a ton a' chi ajol nuk' chi aytek bay Líbano, ʕi nak.

Chi yal ix k'opoj:

16 Titan ach cak'ek' bay norte, titan cayti' ach cak'ek' bay sur, cax chach ec' xuyuyok bay wawoj, yet watx' chi beytoj sumumial jabil. Sebach ach in camc'ulnebil, ocan bay awoj, cax cha loon sat awoj manxa chialok, ʕi ix.

Chi yal nak:

5 1 Lanan woctok xol wawoj ach wetbi camc'ulnebil. Lanan wion aj in mirra c'al in perfume, lanan wablen yal cabil no akan, lanan wuq'uen in vino yetok in leche, ʕi nak.

Chi yal eb amigo:

Ex wamigo lowanek, uq'uek a', uq'uek jantak che yochej, ʕi eb.

Yet is can makan

Chi yal ix k'opoj:

- 2 Waynak in elok, palta iquisc'al in nabal. Max wabeni tol a nak in camc'ulnebil chi awji bay puerta: Jak in octok ach in camc'ulnebil; ach k'opoj, lajan ach axca no cakmu, tol c'am jabok a tacnakil. Caw wal ch'acan in jolom yuj yal ak'bal. Caw wal chi el jil-labok yal ak'bal tu' yin xil in jolom, ʕi nak ayin.
- 3 Mayal wiel in pichil; ʕtom ok waoc junelxa? Mayal in tx'aj wakan; octa pax pokok yin junelxa, quin chi bay.
- 4 A nak in camc'ulnebil tu', max yaoctek nak k'ab bay yolanił puerta. Caw wal max in aj jucnaj yuj.
- 5 Yuj tu' max in aj wan in jakon octek in camc'ulnebil tu'. Toxac'al max el t'ujlabok mirra yin in k'ab, max occan yinlak tz'utz'al puerta. A wal yet max waben k'anjabı, ijanxac'al tol max in cam max wabej.
- 6 A yet max in jakon puerta bay nak in camc'ulnebil tu', c'amxa ec' nak. Max in sayic'ok, majxa ilchaj wuj; max wawtej, palta majxa tak'wok ayin.
- 7 Max in chaloj yuj eb nak patrulla chi ec' taynen conob; max in is mak'on yasjok eb nak. Caw wal yobxac'al max yun yion el eb nak chi taynen puertail conob in k'util.
- 8 Ex k'opoj aj Jerusalén, ak'ek e ti'; ta chi ilchaj nak in camc'ulnebil e yuj, alek bay, tol ayin ti' c'amxa chi techaj wuj in camc'ulal yin nak, quin chi bay eb.

9 ¿Tzet yetal watz'il nak a camc'ulnebil tu' ayach, ach ix tol watz'xac'al eli yintak eb ix ix watz' yili? ¿Tzet-xac'al is watz'il jun a camc'ulnebil tu', xan toxac'al cha k'an ayon tol chi jak' co ti'? xi eb ayin.

10 A nak in camc'ulnebil tu', sak nak, cax cak wak'inak yili; caw wal watz' yili yintak 10,000 winak.

11 A is sat nak, lajan wal yetok oro caw wal watz'; a xil jolom coxquiltak, k'ek yili axca no joj.

12 A is bak' sat, lajan wal axca no cakmu chi ec'jabtok tilak aej, axcaxac'al tol xol leche chi achinwi no', ti najabil a' aej tu' chi ay pakan no'.

13 A wal paq'uul-lak sat, axca wal junok awoj bay ay an ac'un manxa watz'ilok yoc jabil. A wal xak is ti', lajan wal axca junok an xumac watz' yoc jabil.

14 A is k'ab, lajan axca junok xoyan oro ayoc ch'en topacio yin; a is c'ul, axca wal ch'en marfil nululixac'al, tol ayoc ch'en zafiro yelbubok.

15 A wal yakan, lajan wal axca cabok oy naba mármol ayay yiban cabok yich tol naba oro watz'; axa yili, lajan wal axca te c'ute' ay bay Líbano, tol sic'bil elok.

16 A wal is k'anej chi yala', manxa chialok chi jabej, caw wal watz'c'al nak yin masanil. Caywal tu' yili nak in camc'ulnebil ex k'opoj aj Jerusalén, quin chi bay eb.

6 1 ¿Baytal max toj nak a camc'ulnebil tu' ach ix, tol watz'xac'al eli yintak eb ix ix watz' yili? ¿Baytal wal max ca toji, yet watz' chi toj co say etok? xi eb ix ayin.

2 A nak in camc'ulnebil tu', mayal toj nak bay yawoj, bay awbil yawoj tol sumumixac'al yel jabil; max toj nak yak' tzalobjok c'ul, c'al wajon is xumac.

3 Ayin ti', yet in nak in camc'ulnebil tu', cax wet c'apax nak. Chi yak' tzalobjok nak c'ul bay xol an xumac, xi ix.

Yet is so' makan

Chi yal nak:

4 Ach in camc'ulnebil, manxa watz'ilok eli, ochbejtakxac'al eli axca wal yili conob Tirsa, c'al conob Jerusalén tol ayxa may yili, axca junok ejército chi bey yin txolilal.

5 Manchakxac'al mutz'mon oc a sat win, yujtol mayal iji in c'ul oj. A wal xil a jolom, lajan wal axca yili yaytek bululok no chiwo bay pac'an yet Galaad.

6 A wal e, toxac'al chi latz'atz'i, axca wal yili no calnel tolto chi eltek bay chi tx'ajlay elok, cac'onc'al bey no' yetok yune', c'am junok no' tol tx'oklil.

- 7 A wal paq'uiltak a sat makan el yuj junok k'apec, axcac'al yili yul cabok bijan te granada.
- 8 Tzalojokab cham rey yetok 60 eb xal yistzil tol reina yayji, c'al yetok 80 eb xal cab yistzil, yetok c'apax eb ix k'opoj c'amxa chi bishaji.
- 9 Palta ayin ti', asan jun ix wet, axca wal cakmu c'am is tacnakil; asannej oc came'ulnebil yuj is txutx, xan c'am junokxa lajan axca ix ti' yalon xal. A yet chi il-lay ix yuj eb k'opoj, yuj eb xal reina, c'al yuj eb xal yet is cab yistzil cham rey, masanil eb tu' chi alon yuj watx'il yili, xi nak.

Chi yal eb amigo:

- 10 Mactxel jun ix chi tx'ox ba tu', axca wal tx'oxon ba yakan c'u yet k'inibalil. Watx'ac'al yili axca yet tec'an xajaw. Jopopixac'al yili axca yili yakan c'u, ayxa may yili axca ejército chi bey yin txolilal, xi eb.

Chi yal ix k'opoj:

- 11 Max in toj bay te k'akte' nogales, yuj wilon masanil tzet chi wolji bay jobe; max wochej max wila', ta lanan yelol sat an uva, c'al wilon yelol xumaquil te granado.
- 12 Manxac'al naanok wuj, cochwal ayinx a ec' yul carruaje yetok in yajawil, xi ix.

Chi yal eb amigo:

- 13 Meltzojan, meltzojan ach Sulamita. Meltzojan, chi yochej co c'ul chach jila', xi eb amigo.

Chi yal ix k'opoj:

- ¿Tzet yuj xan che yochej che yil in canalwi nan xol ca txol anima ti'? xi ix Sulamita.

Chi yal nak:

- 7** 1 Manxa watx'ilok yili akan yul a xanab ach k'opoj, ach cutz'in rey. A wal a xub, caw wal watx' yili axca wal mulnajil junok jelan yin watx'nej yutxiquinej.
- 2 A wal a c'ul, lajan wal axca junok moc tol ayc'al ay vino yul; axa a nan xin, lajan axca junok bulan ixim trigo oyanxac'al oc xumac yinlak.
- 3 A cabil em, lajan wal axca cac'onok no tx'ucchej, tol tiox max yun yalji.
- 4 A a nuk', lajan wal axca junok torre naba marfil; a a bak' sat, lajan axca cab a' najab bay conob Hesbón, junnej ay bay puertail yet

Bat-rabim; axa a txam xin, lajan wal yetok torre bay Líbano, a ton jun acantok bay conob Damasco.

⁵ A a jolom, can ayajok, axca jolom witz Carmelo; caw wal jopopi yili a xil axca an púrpura. Toxac'al chi ijican aj c'ul jun rey yuj a xil tol tzican aytek.

⁶ Ach in camc'ulnebil, ach ix tol ochbejtak eli, yelxac'al watx' eli.

⁷ Caw wal tojol eli axca junok an palma; axa em, lajan wal axca junjun chaan sat an palma tu'.

⁸ Chin na' wajtok yin an palma tu', cax chi wion aytek an satej. A em, lajan wal axca junjun chaan an uva; a wal xob a ti', sumumixac'al axca yoc jabil te mansan.

⁹ A wal a ti', lajan wal axca vino manxa watx'ilok chi wabej, xi nak.

Chi yal ix k'opoj:

Chaokab nak in camc'ulnebil an vino tu' chi ec' oc yin xak ti', cax chi apni oc yinlak ye.

¹⁰ Yet in wal nak in camc'ulnebil, ochebil in yuj nak.

¹¹ Ton bay xolak awoj ach in camc'ulnebil, chi ec' junok ak'bal juj bay xolak an xumaquil yet alheña.

¹² Axa yet k'inibalil, chon toj bay xolak an uva, yuj jiloni, ta ayxa wol an, ta lananxa pojil xumaquil an. Ok jila', ta lananxa xumacli te granado; a wal bay tu' ok in tx'ox in camc'ulal ayach.

¹³ Caw wal lananxa bey jabil an mandrágora. A bay ti' co na, ayxa sat masanil awoj watx' loji, axca sat awoj takinx, cax tolto chi wajlayi; tx'ok wal max in pojcan el et ach in camc'ulnebil, xi ix.

Chi yal ix k'opoj:

8 ¹ Matawal in nuej ach ach ti', matawal junnej imej max co tz'ubu'. Mata axca tu xin, a yet chach in chaon bay yulak calle, chi mi je' in tz'ubon el a ti' cax c'am mi mactxel chi alon in k'umal.

² Chi mi je' ach wiontok bay yatut in txutx, chach mi wiwal octok yul na tu', ach mi wal chach oc in mehtolok. Ayin mi wal caw chi wak' vino manxa watx'ilok oq'uej, c'al yal te' in granado.

³ A a q'uexan k'ab ayoc yalan in jolom, axa a watx' k'ab chin lak'oni, xi ix.

Chi yal nak:

⁴ Ex k'opoj aj Jerusalén, ak'ek e ti' ayin, tol c'amxa che yak' yochej ajok masantac'al a' ok ochenok, xi nak.

Yet is wak makan

Chi yal eb amigo:

- ⁵ ¿Mactxel jun ix chi tit bay tz'inan tx'otx', tol pakan ay bay yiban jolom xic' is came'ulnebil? ñi eb.

Chi yal ix k'opoj:

- A bay yich jun te mansan, a bay tu' max in xibtej el a wayan. A bay tu' titnak yail c'ul a txutx yet max ach alji.
- ⁶ C'amokab chi cha a c'ul junokxa came'ulal; palta asanokab wet chi cha a c'ul. C'amokab junokxa mactxel cha lak'a'; palta asanokab in chin a lak'a'. A came'ulal ay yipalil axca camich. Axca mukbanil camnak tol c'am chi bekil tzet mitx'bil yuj, caytu' yayji co came'ulal. Axca wal tzak'ak' tol caw wal chi aj xak, caytu' yayji.
- ⁷ A masanil a' mar, c'am chi tzakay a' yak'on tan jun came'ulal ti'; tamwal yowal a' mimek aej, c'am chi je' yak'on tanok. Ta ay mac chi yaltej masanil tzet yetal ay bay yatut yin manon jun came'ulal ti', toc'al mi chi buchlaycan elok, ñi ix.

Chi yal eb nuej ix k'opoj:

- ⁸ Ay jun ix janab tzunan unin, tol c'amto yim ix. ¿Tzet watx' ok jun yetok ix ta chi jayoc k'anomal ix?
- ⁹ Ta lajan ix yetok junok muralla, chi mi co watx'nej aj cabok torre plata yin. Ta lajan axca junok puerta, chi mi co watx'nej yetok chemte' naba c'ute', ñi eb nak.

Chi yal ix k'opoj:

- ¹⁰ Ayin ti', lajan in wal axca junok muralla; axa wim, lajan wal axca juntzan torre, xan caw wal chi tzalojc'ul in came'ulnebil wetok.
- ¹¹ A cham Salomón, ay jun is yawoj uva bay Baal-hamón. Chi yak'can yul k'ab juntzan eb chi taynen tu'. A yet ok wajlay sat uva tu', ok yak' eb nak mil bijan ch'en plata junjun bay cham.
- ¹² Ayokab jun 1000 bijan ch'en plata Salomón, c'al 200 yet eb nak chi taynen tu'; axa in xin, ay wawoj uva yul wet; asan in chin na' tzet chi wutej, ñi ix.

Chi yal nak:

- ¹³ Chi wochej chi wab yul a nuk', ach in came'ulnebil, tol ayach ec' xol awoj. Ac'ala' eb jamigo, chi yochej eb chi yab c'apax yul a nuk', ñi nak.

Chi yalon ix k'opoj:

- ¹⁴ Yelc'ulal chach tit ayin, ach in camc'ulnebil; ak' anej axca junok no tx'ucchej, axca wal junok no yune' tx'ucchej bay tzalanlak bay chi awlay incienso, xi ix.